

**A**i 3 di Avrîl dal 1077, a Pavia, l'imperadôr Indrî IV al decretave la nassite dal Stât Patriarcjâl furlan. Il Stât furlan al durà fintremai al 1420, cuant che al fo conquistât di Vignesia, e al rivà a formis di autoguvier une vore avanzadis pe epoche, tant che il Parlament furlan, une des primis assembleis legjislativis dal mont.

Pal so significât, il 3 di Avrîl al rapresente duncje un moment impuartant pe comunitât furlane, une vere fieste par memoreâ e tornâ a pensâ in clâf moderne lis formis di autoguvier e di rapresentativitât che, par tancj agns, a ân caracterizât la Patrie dal Friûl.

#### LA PRIME EDIZION

La prime edizion de Fieste de Patrie, si è davuelte a Aquilee, tal 1977, nûfcentesim aniversari dal diplome di Indrî IV. Ieadôr e grant protagonist de edizion di scree al è stât pre **Francesc Placerean**, che dopo i fo intitulât l'Istitut Ladin Furlan, l'ent che par agns al à coordinât i avigniments celebratîfs.

Intai dîs de "Fieste" ta dut il teritori furlan, e ancje fûr dal Friûl, a vegnin fatis diversis manifestazions che si sierin intun unic event celebratîf organizât ogni an intun comun diferent dal Friûl. Il 2015 al è stât l'an che al à viodût ricognossude uficialmenti de bande de Regjon la Fieste de Patrie dal Friûl, in graciis de

Moment impuartant ai 3 di Avrîl pe comunitât furlane che e ricuarde la nassite dal Stât Patriarcjâl. Chest an la manifestazion principâl si tignarà a Gardiscje.



## Bon complean Patrie dal Friûl!

aprovazion de Leç 6 dai 27 di Març. La manifestazion principâl de edizion 2016 de Fieste si tignarà intal Comun di Gardiscje, in provincie di Gurize.

#### CAPITÂL PAR UNE DÌ

Il program de zornade dai 3 di Avrîl al tacarà aes 10.30 cul incuintri davanti dal Teatri comunâl pe esposizion de bandiere dal Friûl. Aes 11.15 i

trê Vicjaris dai Vescui furlans a celebraran insieme la Sante messe in lenghe furlane intal Domo. Po dopo, aes 12.15, li dal Teatri comunâl, si varà la celebrazion civil cu la leture de Bole costitutive dal Stât Patriarcjâl, i intervencs des autoritâts e la premiazion dal concurs pes scuclis "Emozions furlanis in viaç pal teritori".

✉ alessandro.digiusto@ifriuli.it


#### ■ DEBUT LETERARI

### Il troi di Aquilee contât di Romanini

Tal "Anno nazionale dei cammini" proclamât dal ministeri dai Bens culturâi e a dîs agns de scree dal "Cammino Celeste", **Christian Romanini** al fâs il so debut leterari.

"Sul Troi di Aquilee", edizions di Glesie Furlane, al è il libri che joibe ai 24 di Març al è stât presentât in anteprime ae stampe in Regjon. A fâ di "santul" il vicepresidente **Sergio Bolzonello** che juste cualchi setemane indaûr al

veve viert i "Stati generali dai cammini". Te sede regjonâl di Udin al è intervignût ancje **Enos Costantini**, che al à scrit une letare publicade tal libri di Romanini.



**Chest libri al è un diari di viaç**, che l'autôr al dediche a so fi Lorenzo dopo vè cjaminât par cuatri dîs dilunc dal "Cammino Celeste": "O ai decidût di vivi cheste esperience, fasint il prin toc di chel pelegriñaç clamât Iter Aquileiense, parcè che o volevi lassâti une testimonance a ti, Lorenzo. Plui che un viaç a pît, al è un viaç drenti di me, di te, de nestre storie".

La prime presentazion publiche di "Sul Troi di Aquilee" e je programade par joibe ai 31 di Març li de librerie Odòs, a Udin in vicolo della Banca aes sîs di sere cuant che cul autôr al dialogarà Alessandro Di Giusto.

## Gnûfs travuarts par 'Suns Europe'

**UDIN.** Dopo il suces de edizion 2015, Arlef e Regjon FvJ a lavorin par che il Festival european des arts performativis in lenghe minoritarie "Suns Europe" al puedi rivâ a gnûfs travuarts.

Il prin, al è chel di une plui grande visibilitât in graciis de realizazion dal documentari di 40 minûts curât dal regista **Marco D'Agostini** che si podarà viodi, ai 27 di Març, aes 10.20 cirche (cun repli-

che miercus ai 30 di Març, aes 21.30 cirche, su Rai 3 bis, canâl 103 dal digjitâl terestri), su Rai 3 FvJ. Presentât di **David Benvenuto**, il documentari si mûf cjatant i protagoniscj de manifestazion che, inte lôr lenghe mari, a contin la tiere di divignince e la emozion di cjatâsi a Udin par chest Festival internazionâl.

"Un Festival come Suns Europe, dongje de promozion de di-

versitât culturâl, dai dirits linguistics, de creativitât e de colaborazion tra la nestre regjon e il rest di Europe, al vierç une strade gnove pe valorizazion in clâf turistiche dal teritori, propit tacant des sôs particolaritâts linguistiche e culturâls e, par chest, la Regjon e vûl confermâ il sô sostegn lavorant in sinergie tra i diferents comparts", al dîs **Gianni Torrenti**, assessôr regjonâl dal FvJ pe Culture.

#### SCOLTADIS DI DRIUS

### Maglis

Se no mi visi ce ch'o ài cenât baste che tal doman o cjali les maglis su le golarine.

